

四庫全書

集部

欽定四庫全書

集部

唐詩品彙卷

七十五

詳校官檢討臣德生

助教臣常循覆勘

總校官進士臣朱鈐

校對官編修臣勵守謙

謄錄監生臣愍意誠

欽定四庫全書

唐詩品彙卷七十七

明高棅編

五言排律七

接武上

錢起

省試相靈鼓瑟

善鼓雲和瑟常聞帝子靈馮夷空自舞楚客不堪聽苦

調淒金石清音入杳冥蒼梧來怨慕白芷動芳馨流水
傳相浦悲風過洞庭曲終人不見江上數峰青

觀法駕自鳳翔迴

攬捨一掃滅闔闔九重開海晏鯨鯢盡天旋日月來聖
情蘇品物龍御闕雲雷曉漏移仙仗朝陽出帝臺周慚
散馬出禹讓濬川迴欲識豐人願南山舉酒杯

題玉山村叟壁

谷口孖泉石居人能陸沈牛羊下山小煙火隔雲深一

徑入溪色數家連竹陰藏虹辭晚雨驚隼落殘禽涉趣
皆流目將歸羨在林却思黃綬事辜負紫芝心

送王諫議任東郡居守

車徒鳳掖東去去洛陽宮暫以青蒲隔還看紫禁同經
過乘雨露瀟灑出鴛鴻官署名臺下雲山舊苑中暮天
雙闕靜秋月九重空且喜成周地詩人播國風

送鄭書記

決勝無遺策辭天便請纓出身唯殉死報國且能兵受

命麒麟殿叅謀驃騎營
短簫催別酒斜日駐前旌
義勇千夫敵風沙萬里行
幾年丹闕下侯印賜書生

送族姪赴任

林下不成興仲容微祿牽客城
千里遠別念一帆懸欲
歎卑樓去其如興趣偏
雲山深郡郭花木淨潮田坐嘯
唯應下離居月復圓
此時知小阮相意綠罇前

送鮑中丞赴太原軍營

年壯才仍美時來道易行
寵兼三蜀任威肅二師營
將

畧過南仲天心寄北京雲旂臨塞色龍笛出關聲漢月
隨霜去邊塵計日清漸知王事好文武用書生

送李秀才落第遊荆楚

翠羽雖成夢遷鶯尚後羣名逃却說策興發謝玄文昏
旦扁舟去江山幾路分上潮吞海日歸鴈出湖雲詩思
應須苦猿聲莫厭聞離居見新月那得不思君

送李九歸河北

文武資人望謀猷簡聖情南州初卧鼓東土復維城寄

重分符去威仍出間行斗牛移八座日月送雙旌別戀
瞻天起仁風應物生佇聞收組練鏘玉會承明

送王使君赴太原行營

太白明無象皇威未戢戈諸侯持節鉞千里控山河漢
驛雙旌度胡沙七騎過驚蓬連鴈起牧馬入雲多不賣
虛龍塞能消瀚海波須傳出師頌莫奏式微歌

奉和宣城張太守南亭秋夕懷友

池館蟪蛄聲梧桐秋露晴月臨朱戟靜河近畫樓明捲

幔浮涼入聞鐘永夜清片雲懸曙斗數鴈過秋城羽扇
揚風暇瑤琴悵別情江山飛麗藻謝朓讓詩名

陪南省諸公宴殿中李監宅

將門高勝霍相子寵過韋宦貴攀龍後心傾待士持壺
觴開雅宴鴛鷺眷相隨舞退燕姬曲歌徵謝朓詩晚鐘
過竹靜醉客出花遲莫惜留餘興良辰不可追

春夜燕任六昆季宅

際晚綠煙起入門芳樹深不才叨下客喜宴齒諸簪夜

月仍攜妓清風更在林彩毫揮露色銀燭動花陰自接
通家好因知待士心向隅逢故識茲夕願披襟

宿畢侍御宅

交情頻更好子有古人風晤語清霜裏平生苦節同心
唯二仲合室乃一瓢空落葉寄秋菊愁雲低夜鴻薄寒
燈影外殘漏雨聲中明發南昌去迴看御史驄

過楊駙馬亭子

衣冠在漢庭臺榭接天城彩鳳翻簫曲祥鱣入館名歌

鐘芳月曙林嶂碧雲生亂水歸潭淨高花映竹明退朝
追燕樂開閣醉簪纓長袖留嘉客栖鳥下禁城

過山人所居固寄諸遺補

空谷春雲滿愚公悔跡深一隨玄豹隱幾換綠蘿陰絕
徑人稀到芳蓀我獨尋厨煙住峭壁酒氣出重林蝴蝶
晴還舞黃鸝晚暫吟所思青瑣客瑤草寄幽心

春暮過石龜谷題溫處士林園

隱几無名老何年此陸沈丘園自得性婚嫁不嬰心歲

計因山薄霞栖在谷深設置連草色曬藥背松陰觸興
雲生岫隨耕鳥下林耆頤笑來客頭上有朝簪

哭常徵君

萬化一朝盡窮泉悲此君如何丹竈術能誤紫芝焚不
遂蒼生望空留封禪文遠年隨逝水真氣盡浮雲山閉
龍蛇蟄林寒麋鹿羣傷心載酒地仙菊為誰熏

送嚴士良侍奉詹事南遊

疎傳獨知止曾參善愛親江山侍行邁長幼出囂塵握

手想千古此心能幾人
風光滿長陌草色傍征輪
日夕望荆楚鶯鳴芳杜新
漁煙月下淺花嶼水中春
點翰遙相憶含情向白蘋

過王舍人宅

入門花柳暗知是近臣
居大隱心何遠高風物自疎
脩然靜者事究得上皇餘
雞犬偷仙藥兒童受道書
清吟送客後微月上城初
綵筆有新詠文章垂太虛
承恩金殿宿應薦馬相如

奉和聖制登朝元閣

六合紆玄覽重軒啓上清石林飛棟出霞頂太階平拂
曙鑿輿上晞陽瑞雪晴翠微回日馭丹鸞駐天行御氣
升銀漢垂衣俯錦城山通玉苑迥河抱紫闕明感物乾
文動凝神道化成周王陟喬嶽列辟讓英聲

陪郭常侍令公東亭宴集

盛業山河列重名劍履榮珥貂為相子開閤引時英美
景池臺色佳期宴賞情詞人載筆至仙妓出花迎暗竹

朱輪轉回塘玉佩鳴舞衫招戲蝶歌扇隔啼鶯飲德心
皆醉披雲興轉清不愁歡樂盡積慶在和羹

夕遊覆釜山道士觀因登玄元廟

冥搜過物表洞府次溪傍已入瀛洲遠誰言仙路長狐
煙出深竹道侶正焚香鳴磬愛山靜步虛宜夜涼仍同
象帝廟更上紫霞岡霽月懸琪樹明星映碧堂傾思丹
竈術願采玉芝芳儻挹浮丘袂乘雲別舊鄉

送張中丞赴桂州

出守求人瘼推賢動聖情紫臺初下詔皂蓋始專城寵
借飛霜簡威加却月營雲衢降五馬林水引雙旌夙仰
敦詩禮常聞偃甲兵戍樓雲外靜訟閣竹間清化佇還
珠美心將片玉貞冠恂朝望重計日謁承明

送王相公赴范陽

翊聖銜恩重頻年按節行安危皆報國文武不緣名受
賑仍調鼎為霖更洗兵幕開丞相閣旗總貳師營料敵
知無戰安邊自有征代雲橫馬首燕鴈拂笳聲去鎮關

河靜歸看日月明
欲知瞻戀切遲暮一書生

奉送戶部李郎中充晉國副節度出塞

德佐調梅用忠輸擊虜
年子房推廟畧漢主記兵權受
命榮中禁分麾鎮左賢
風生黑山道星下紫微天
始願文經國俄看武定邊
鬼方堯日遠幕府代雲連
汗馬將行矣盧龍已肅然
闕防驅使節花月眷離筵
自忝知音遇而今感義偏
淚聞橫吹落心逐去旌懸
帝念夔能政時須說濟川
勞還應即爾朝暮玉墀前

劉長卿

栖霞寺東峯尋南齊明徵君故居

山人今不見山鳥自相從
長笑思齊主終身卧此峰
泉源通石徑澗戶掩塵容
古墓依寒草前朝寄老松
片雲生半壁萬壑徧踈鐘
惆悵長空去猶疑林下逢

九日蔡國公主樓

主第人何在重陽客暫尋
水餘龍鏡色雲罷鳳簫音
暗牖藏昏曉蒼苔換古今
晴山卷幔出秋草閉門深
籬菊

仍新吐庭槐尚舊陰年年畫梁燕來去豈無心

自道林寺西入石路至麓山寺過法崇師故居

山僧候谷口石路拂莓苔深入泉源去遙從樹杪回香
隨青霽散鐘過白雲來野雪空齋掩山風古殿開桂寒
知自發松老問誰栽惆悵相江水何人更渡杯

行營酬呂侍御

時尚書問罪襄陽軍次漢東境上侍御以舟部賊境後有水火

迫於征稅
詩以見喻

不敢淮南卧來趨漢將營受辭瞻左鉞扶疾拜前旌井

稅鷄衣樂壺漿鶴髮迎水歸餘斷岸烽至掩孤城晚日
當千騎秋風合五兵孔璋才素重早晚檄書成

長沙早春雪後臨湘水呈同遊諸子

汀洲暖漸綠煙水淡相和舉目方如此歸心豈奈何白
花浮野雪春色染湘波北渚生芳草東風變舊柯江山
古思遠猿鳥暮情多君問漁人意滄浪自有歌

送鄭十二歸廬山

潯陽數畝宅歸卧掩柴闕谷口何人在門前秋草閒忘

機青藥罷不語拄藜還舊筓成寒竹空齋向暮山水流
過舍下雲去到人間桂樹花應發因行寄一攀

送鄭說之歙州謁薛侍郎

漂泊來千里謳歌滿百城漢家尊太守魯國重諸生俗
變人難理江傳水至清船經危石住路入亂山行老得
滄洲趣春傷白首情嘗聞馬南郡門下有康成

送荀八過山陰舊縣兼寄剡諸官

訪舊山陰縣扁舟到海涯故林嗟滿歲春草憶佳期晚

景千峰亂晴江一鳥遲桂香留客處楓暗泊舟時舊石
曹娥篆空山夏禹祠剡溪多吏隱君去道相思

毘陵送鄒結先赴河南判官

王事相逢少雲山奈別何芳年臨水怨瓜步上湖過客
路方驚楚鄉心共渡河凋殘春草在離亂故城多罷戰
逢時泰輕徭佇俗和東西此分手惆悵恨煙波

無錫東郭送友人遊越

客路風霜曉郊原春興餘平蕪不可望遊子去何如煙

水乘湖濶雲山逼越初舊都懷作賦古穴覓藏書碑缺
曹娥宅林荒逸少居江湖無限意非獨羨樵漁

奉陪鄭中丞自宣州解印與諸姪宴餘干後溪
跡遠親魚鳥功成厭鼓鞀林中阮氏集池上謝公題戶
牖垂藤合藩籬挿檜齊夕陽山向背春草水東西看竹
誰家好尋花幾路迷何勞問秦漢更入武陵溪

奉和趙給事留贈李舍人兼謝舍人

便道訪情親東方千騎塵禁深分直地夜遠獨行春絳

闕辭明主滄洲識近臣
雲山隨候吏雞犬逐歸人
庭顧
婆娑老邦傳蔽芾新
玄暉翻佐理聞到郡齋頻

至饒州尋陶十七不在寄贈

謫宦投東道逢君已北轅
孤蓬向何處五柳不開門
去國空回首懷賢欲訴冤
梅枝看嶺嶠竹路過湘源
月下高秋鴈天南獨夜猿
離心與流水萬里共朝昏

贈阮容州

擁旌臨合浦上印卧長沙
海徼長無戍相山獨種畝
政

傳道歲貢才惜過年華萬里依孤劍千峰寄一家累徵
期旦暮未起戀煙霞避世歌芝草休官醉菊花舊遊如
夢裏此別是天涯何事滄波上漂漂逐海查

題裴式微餘干東齊亭

世事終成夢生涯半欲過白雲心已矣滄海意如何藁
杖全吾道榴花養太和春風騎馬醉江月釣魚歌散帙
看蟲蠹開門見雀羅遠山終日在芳草傍人多吏體莊
生傲方言楚俗訛屈平君莫弔腸斷洞庭波

留題李明府霅溪書堂

寥寥此堂上幽意獨難論
落日無王事青山在縣門
雲峰向高枕漁釣入前軒
竹動疎簾影苔生雙履痕
荷香隨坐卧湖色映晨昏
虛牖閒生白鳴琴靜對言
暮禽飛上下春草帶清渾
遠岸誰家柳孤煙何處村
謫居投瘴癘離思過相沅
從此扁舟去誰堪江浦猿

謫居干越亭作

天南愁望絕亭上柳條新
落日獨歸鳥孤舟何處人
生

涯投越徼世業陷胡塵杳杳鍾陵暮攸攸鄱水春秦臺

悲白首楚澤怨青蘋草色迷征路鶯聲傍逐臣獨醒翻

引笑直道不容身得罪風霜苦全生天地仁高仲武云可謂傷而

不怨亦足以發揮風雅矣青山數行淚滄海一窮鱗牢落機心盡唯

憐鷗鳥親楊文公說苑云咸平初罷處州赴闕道經餘干登干越亭前瞰琵琶州後枕思禪寺林麓

森鬱天下之絕境古今留題者百餘篇而對此篇絕唱也

覆按後赴睦州贈苗侍郎

地遠心難達天高謗易成羊腸留覆轍虎口脫餘生直

氏偷金枉于家決獄平一言知己重片議殺身輕日下
人誰憶天涯客獨行年光銷蹇步秋氣入衰情建德知
何在長江問去程孤舟百口淚萬里一猿聲落日開鄉
路空山向郡城豈令冤氣積千里在長平

初貶南巴至鄱陽題李嘉祐江亭

南出巴人嶠長江萬里隨不才甘謫去流水亦何之地
遠明君棄天高酷吏欺青山獨往路芳草未歸時流落
還相見悲歡話所思猜讒傷薏苡愁慕向江離淚盡看

長劍心閒倚釣絲水雲初起重暮鳥遠來遲稚子能吳
語新文怨楚辭憐君不得意客鬢老南枝

禪智寺上方懷涵和上人

寺即和
尚所創

絕巘東林寺高僧惠遠公買園隨苑下持鉢楚城中斗
極千燈近煙波萬井通遠山低月殿寒木露花宮紺宇

焚香靜滄洲罷

集作
罷

霧空鴈來秋色裏曙起早朝東飛

錫今何在蒼生待發蒙白雲翻送客黃葉白辭風捨筏
追開土回舟狎釣翁平生江海意唯共白鷗同

唐詩品彙卷七十七

欽定四庫全書

唐詩品彙卷七十八

明 高棟 編

五言排律八

接武 中

皇甫冉

冬夜集賦得寒漏

清冬洛陽客寒漏建章臺出禁因風徹紫牕共月來偏

將寒籟雜乍與遠鴻哀
遙夜重城警流年滴水催
閒齋堪坐起況有故人杯

送歸中丞使新羅

詔使殊方遠朝儀舊典行
浮天無盡處望日計前程
甍喜孤山出長愁積水縈
野風颭疊鼓海雨濕危旌
異俗知文教通儒有令名
還將大戴禮方外授諸生

河南鄭少尹城南亭送鄭判官還河東

使臣懷餞席亞尹有前溪
客是仙舟裏塗從御苑西
泉

聲喧暗竹草色引長堤故絳青山在新田綠樹齊天秋
聞別鶴關曉候鳴鷄應歎沈冥者年年津路迷

宿嚴維宅送包七

江湖同避地分手自依依盡室今為客經秋空念歸歲
儲無別墅寒服羨鄰機草色村橋晚蟬聲江樹稀夜涼
宜共醉時難惜相違何事隨陽侶汀洲忽背飛

酬張二仲異

吳洲見芳草楚客動歸心屈宋鄉山古荆衡煙雨深艱

難十載別羈旅四愁侵澧月道沅水湘雲入桂林已看
生白髮當為乏黃金江海時相見唯聞梁甫吟

登玄元廟

古廟川原迫重門禁禦連海童紛翠蓋羽客事瓊筵御
路分踈柳離宮出苑田興新無向背望久辨山川物外
將遺老區中誓絕緣函闕若遠近紫氣獨依然

和袁郎中破賊後經剡中山水

武庫分帷幄儒衣事鼓鞶兵連越徼外寇盡海門西節

比全踈勒功當雪會稽旌旗回剡嶺士馬濯靈溪受律
梅初發班師草未齊行看佩金印豈得訪丹梯

送從弟豫貶遠州

何事成遷客思歸不見鄉遊吳經萬里弔屈過三湘水
與荆巫接山通鄆郢長名嗟黃綬繫身白白着良獨結
南枝恨應思北鴈行憂來沽楚酒玄鬢莫凝霜

閒居作

多病辭官罷閒居作賦成圖書唯藥錄飲食止藜羹學

謝淹中術詩無鄴下名不堪趨建禮詎是厭承明已輟
金門步方從石路行遠山期道士高柳覓先生性懶尤
因疾家貧自省營種苗雖尚短穀價幸全輕篇詠投康
樂壺觴就步兵何人肯相訪開戶一逢迎

奉和獨孤中丞遊法華寺

謝君臨郡府越國舊山川訪道三千界當仁五百年巖
空騶馭響樹密旆旌連閣影凌空壁松聲助亂泉開門
得初地伏鑑接諸天向背春光滿樓臺古製全羣峰爭

綠翠百谷會風煙香象隨僧久祥烏報客先清心乘暇
日稽首慕良緣法證無生偈詩成大雅篇蒼生望已久
迴駕獨依然

皇甫曾

送和蕃使

白簡初分命黃金已在腰恩華道外國徒御發中朝雨
雪從邊起旌旗上隴遙暮天沙漠空磧馬蕭蕭寒路
隨河水闕城見柳條和戎先罷戰知勝霍嫫姚

送王相公赴幽州

台袞兼戎律勤憂乘化元鳳池東掖寵龍御北方尊長
路山河轉前驅鼓角喧人安布時令地遠答君恩暮日
平沙迥秋風大旆翻漁陽在天末戀別信陵門

贈鑒上人

律儀傳教誘僧臘老煙霄樹色依禪誦泉聲入寂寥寶
龕經末劫畫壁見南朝深竹風開合寒潭月動搖息心
歸靜理愛道坐中宵更欲尋空去乘船過海潮

嚴維

剡中贈張卿侍御

辟疆年正少公子貴初還早列月卿位新參柱史班千
夫馳驛道駟馬入家山深巷烏衣盛高門畫戟閒逶迤
天樂下照耀剡溪間自賤遊章句空為衰草顏

奉和劉祭酒傷白馬

此馬新賜寧
王轉贈祭酒

沛艾如龍馬來從上苑中棣華恩見賜伯舅禮仍崇鏡
點黃金眼花開白雪驄性柔君子德足逸大王風色點

鳴珂淨聲連噴玉雄食場恩未盡過隙命旋終練影依
雲沒銀鞍向月空仍聞樂府唱猶念代勞功

李嘉祐

和袁郎中破賊經剡中山水

授律仙郎青長驅下會稽鳴笳山月曉搖旆野雲低剪
寇人皆賀回車馬自嘶地聞春草綠城靜夜烏啼破竹
清閩嶺看花入剡溪元戎催獻捷莫道事攀躋

韋應物

送崔押衙赴州

項任內
黃令

禮樂儒家子英豪燕趙風驅雞嘗理邑走馬却從戎白

刃千夫闕黃金四海同

劉云甚
有氣味

標桃思願下諸將指揮

中別路憐芳草歸心伴塞鴻鄴城新騎滿魏帝舊臺空

望闕應懷戀遺時貴立功萬方如已靜何處欲輸忠

劉云

贈人語和
此有味

韓翃

奉送王相公赴幽州

黃閣開帷幄丹墀侍冕旒位高湯左相權總漢諸侯不
改周南化仍分趙北憂雙旌過易水千騎入幽州塞草
連天暮邊聲動地秋無因隨遠道結束佩吳鉤

送李中丞赴商州

五馬渭橋東連嘶逐曉風當年紫髯將他日黑頭公不
異金吾寵兼齊玉帳雄閉營春雪下吹角暮山空香麝
松陰裏寒猿黛色中郡齋多賞事好與故人同

盧綸

從軍行

二十在邊城軍中得勇名卷旗收敗馬占磧擁殘兵覆
陣烏鳶起燒山草木鳴塞閒思遠獵師老厭分營雪嶺
無人跡冰河有鴈聲李陵甘此沒惆悵漢公卿

送鮑中丞赴太原

分路引鳴騶喧喧似隴頭髮移西掖望全解北門憂專
幙臨都護分曹制督郵積兵營不下盛雪獵方休白草
連胡帳黃金擁戍樓

劉須溪云倒用黃金事好

今朝送旌旆一減魯

儒羞

晚到盤屋耆老家

老翁曾舊識相引到柴門欲話別時事因尋溪上村數
年何處客近日幾家存冒雨看禾黍逢人憶子孫亂藤
穿井口流水到籬根惆悵不堪住空山月又昏

過李尊師院

城闕望煙霞常悲仙路賒寧知樵子逕得到葛洪家犬
吠松間月人行洞裏花留詩千載鶴送客五雲車訪世

山空在觀棋日未斜不知塵俗士誰解種胡麻

奉陪侍中春日過武安君廟

長裾間貌虎遺廟盛攀登白羽三千騎紅林一萬層元
臣達幽契祝史告明徵撫坐悲今古瞻容感廢興迴風
卷叢陌驟雨濕諸陵倏忽煙花霽當營看月昇

雪謗後書事上皇甫大夫

盛德總羣英高標仰國禎獨安巡狩日曾掩趙張名業
就難辭寵朝迴更授兵曉川分牧馬夜雪覆連營長策

威殊重嘉謀翊聖明
畫圖窺陣勢夢筆紀山行
綬拂池中影珂搖竹外聲
腸歡徵妓樂陪醉間公卿
却憶經前事翻疑得此生
分深存歿感恩在子孫
榮覽鏡愁將老捫心喜復驚
東西遭世難流浪識交情
閱古宗文舉推才慕正平
應憐守貧賤又欲事躬畊

和常舍人晚秋集賢院即事十二韵寄贈江南

徐薛二侍郎

綸閣九華前森沈綵仗連
洞門開旭日清禁肅秋天
霜

滿朝容備鐘餘曉漏傳
搖瑤階羽扇端弁入爐
煙麟筆
刑金篆龍綃薦玉編汲
書荀勗定漢史蔡邕專
御竹潛
通筍宮池暗瀉泉亂叢
榮弱蕙墜葉灑枯蓮列
署齊遊
日重江竝謫年登封思
議草侍講憶同筵滄海
風濤廣
黜山瘴雨偏唯應絨上
寶贈遠一呈妍

帝袞

晚秋集賢院即事寄徐薛二侍郎

穆穆上清居沈沈中秘書
金鋪深內殿石甃淨寒
渠花

樹臺斜倚空煙閣半虛縹囊披錦繡翠軸卷瓊琚墨潤
冰文繭香銷蠹字魚翻黃桐葉老吐白桂花初舊德雙
遊處聯芳十載餘北朝榮庾薛西漢盛嚴徐侍讀親華
宸徵吟步綺疏綴簾金翡翠賜硯玉蟾蜍序帙東南遠
離憂歲月除承明期重入江海意何如

奉和聖制麟德殿燕百寮應制

雲闕御筵張山呼聖壽長玉闌豐瑞草金陛立神羊台
鼎資庖膳天星奉酒漿蠻夷陪作位屏象舞成行網已

祛三面歌因守四方千秋不可極
花發滿宮香

登栖霞寺

林香雨氣新
山寺綠無塵
遂結雲外侶
共遊天上春
鶴鳴金閣麗
僧語竹房鄰
待月水流急
惜花風起頻
何方非壞境
此地有歸人
迴首空門外
皤然一幻身

逢南中使寄嶺外故人

見說南來處
蒼梧指桂林
過秋天更暖
邊海日長陰
巴路緣雲出
蠻鄉入洞深
信回人自老
夢到月應沈
碧水

通春色青山寄遠心
炎方難久客為爾一沾襟

代員將軍罷戰後歸故里

結髮事疆場全生俱到鄉
連雲防鐵嶺同日破漁陽
牧馬胡天晚移軍積路長
枕戈眠古戍吹角立繁霜
歸老勲仍在酬恩虜未忘
獨行過邑里多病對農桑
雄劍依塵囊兵符寄藥囊
空餘麾下將猶逐羽林郎

題金吾郭將軍石伏茅堂

雲戟曙沈沈軒墀清且深
家傳成棟美堯寵結茅心
玉

佩多依石油幢亦在林
鑪香諸洞暖殿影衆山陰
草奏風生筆開筵雪滿
琴客從龍闕至僧自虎溪
尋瀟灑延清賞周流會
素襟終朝惜塵步一醉見
華簪

詠冬瑰花

奉和中書李舍人昆
季咏寄徐邠中之作

獨鶴寄煙霜雙鸞思晚芳
舊陰依謝宅新艷出蕭牆
蝶散搖輕露鶯銜入夕陽
雨朝勝濯錦風夜劇焚香
麗日千層艷孤霞一片光
密來驚葉少動處覺枝長
布影期高賞留春為遠方
嘗聞贈瓊玖叨和愧升堂

和考功員外杪秋憶終南舊宅之作

靜憶溪邊宅知君許謝公曉霜凝未耜初日照梧桐澗
鼠喧藤蔓山禽竄石叢白雲當嶺雨黃葉繞階風野菜
垂橋上高泉落水中歡榮來自間羸賤賞曾通月滿珠
藏海天晴鶴在籠餘音如可寄願得隱橋東

早秋望華清宮樹因以成詠

可憐雲木叢滿禁碧濛濛色潤靈泉近陰清輦路通玉
壇標八桂金井識雙桐交映凝寒露相和起夜風數枝

盤石上幾葉落雲中燕拂宜秋霽蟬鳴覺晝空翠屏更
隱見珠綴共玲瓏雷雨生成早樵蘇禁令雄野藤高助
綠仙果迥呈紅惆悵繚垣暮茲山聞暗蟲

司空曙

題玉真公主山池院

蕭士簪云按唐史大極元
年玉真公主與金仙公主

為道士始封崇昌縣主俄進號上清玄都大洞
三景法師天寶三載上言曰先帝許安捨家今
仍叨主第舍租賦願去公主號罷邑司歸之王
府玄宗不許又言妻高宗之孫睿宗之女於天
下不為賤何必名繫主號資湯沐然後為貴請
入數百家之產延千年之命帝知主意乃許之

楚賢
應時

香殿留遺影春朝玉戶開羽衣重素几珠網儼輕埃石
自蓬山得泉經太液來柳絲遮綠浪花粉落青苔鏡掩
鸞空在霞消鳳不回唯餘碧桃樹傳是上仙栽

晦日益州北地陪宴

臨汎從公日仙舟翠幙張七橋通碧沼雙樹接花塘玉
燭收寒氣金陵隱夕光野聞歌管思水靜綺羅香遊騎
繁林遠飛橈截岸長郊源懷灞滙陂澹寫江黃常侍傳

花詔偏裨問羽觴，豈令南峴首千載播餘芳。

和王卿立秋即事

秋宜何處看，試問白雲官。暗入蟬鳴樹，微侵蝶遶蘭。向
風涼稍動，近日暑猶殘。九陌浮埃滅，千峰爽氣攢。換衣
防竹暮，沈果訝泉寒。宮響傳花杵，天清出露盤。高禽當
側弁，遊鱗對憑闌。一奏招商曲，空令繼唱難。

奉和常舍人晚秋集賢院即事寄徐薛二侍郎
藹藹鳳凰宮，蘭臺玉署通。夜霜凝樹羽，朝日照相風。官

附三台貴儒開百代宗司言陳禹命侍講發堯聰香卷
青編內鉛分綠字中綴籤從太史鏘珮揖羣公池接天
泉碧林交御果紅寒龜登故葉秋蝶戀踈叢顏謝徵文
並鍾裴議事同離羣驚海鶴屬思怨江楓地遠姑蘇外
天長越絕東慚當哲匠後下曲本難工

耿漳

入塞曲

將軍帶十圍重錦製戎衣猿臂銷弓力虬鬚長劍威首

登平樂宴新破大宛歸樓上
株拈笑門前問客稀
暮烽

玄兔急秋草紫駟肥
未奉君王詔高槐晝掩扉

方虛谷云將帥

而有富貴如此者少矣

仙山行

深溪人不到杖策獨緣源
花落尋無徑雞鳴覺近村
數翁皆藉草對奕復臨樽
看畢初圍局歸逢幾世孫
雲迷入洞處水引出山門
惆悵歸城郭樵柯跡尚存

奉送崔侍御和蕃

萬里華戎隔風沙道路秋新思明主啓舊好使臣修旌
節隨邊草關山見戍樓俗殊人左衽地遠水西流日暮
冰先合春深雪未休無論善長對博望自封侯

送歸中丞使新羅冊立弔祭

遠國通王化儒林得使臣立君成

集作六
軍承

典冊行弔

集作

萬里奉絲綸雲水連孤棹思思在一身悠悠龍節去渺渺

蜃樓新望裏山仍暮波中歲又春昏明看日色靈怪問
舟人城邑分華夏衣裳擬縉紳他時禮命畢歸路不迷

津

吉中孚

送歸中丞使新羅冊立弔祭

官稱漢獨坐身是魯諸生絕域通王制窮天問水程島
中分萬象日處轉雙旌氣積魚龍窟濤翻水浪聲路長
經歲去海盡向山行復道殊方禮人瞻漢使榮

李益

送歸中丞使新羅冊立弔祭

東望扶桑日何年是到時片帆通雨露積水隔華夷浩
渺風來遠虛明鳥去遲長波靜雲月孤島宿旌旗別業
傳秋意迴朝動客思滄溟無舊路何處問前期

陳季

鶴警露

南國商飈動東臯野鶴鳴溪松寒暫宿露草滴還驚欲
有高飛意空聞召侶情風間傳藻質月下引清聲未假
搏扶勢焉知羽翼輕吾君開太液願得應皇明

湘靈鼓瑟

神女汎瑤瑟古祠儼野亭楚雲來泱泱湘水助清泠妙
指微幽契繁聲入杳冥一彈新月白數曲暮山青調苦
荆人怨時遙帝子靈遺音如可賞試奏為君聽

莊若訥

湘靈鼓瑟

帝子鳴金瑟餘聲自抑揚悲風絲上斷流水曲中長出
沒遊魚聽透迤彩鳳翔微音時扣徵雅韻乍含商神理

誠難測幽情詎可忘至今聞古調應恨滯三湘

包佶

送日本國聘賀使晁巨卿東歸

上才生下國東海晝西鄰九譯蕃君使千年聖主臣野
情偏得禮水性本含仁錦帆乘風轉金裝照地新孤城
開廬閣曉日上車輪早識來朝歲塗山玉帛均

劉方平

寄隴右嚴判官

副相西征重蒼生屬望辰還同周薄伐不取漢和親虜
陣摧枯易王師決勝頻高旗臨鼓角太白靜風塵赤狄
爭歸化青羌已請臣遥傳閩外美盛選幕中賓玉劍光
初發冰壺色自真忠貞期報主章服豈榮身邊草含風
綠征鴻過月新胡笳長出塞隴水半歸秦絕幕多來往
連年憶苦辛路經西漢雪家擲後園春誰念烟雲裏深
居汝頰濱一叢黃菊地九日白衣人松葉踈開嶺桃花
密應津練書若有寄為訪許由鄰

李端

遊終南山寄蘇奉禮

半嶺逢仙駕，清晨獨採芝。
壺中開白日，霧裏捲朱旂。
猿鳥知歸路，松蘿見會時。
雞聲傳洞遠，鶴語報家遲。
童子閒驅石樵，夫樂看棋。
依稀醉後拜，恍惚夢中辭。
海上終難接，人間益自疑。
風塵甘獨老，山水但相思。
願得燒丹訣，流沙永待師。

崔峒

寄上禮部李侍郎

吳楚相逢處江湖共汎時
任風舟去遠待月酒行遲
白髮常同歎青雲本要期
貴來君却少秋至老堪悲
玉珮明朝盛蒼苔陋巷滋
追尋恨無路唯有夢相思

張繼

送判官往陳留

齊宋分廵地頻年比用兵
女停襄邑杼農廢汶陽畊

高仲

武云可謂
事理雙切

使者乘軺去諸藩擁節迎
深仁佐君子薄賦

邱黎吐火燎原猶熱風搖海未平

比興深矣

應將否泰理一

問魯諸生

令狐峘

釋奠日國學觀禮聞雅頌

肅肅先師廟依依胄子羣滿庭陳舊禮開戶拜清芬萬
舞當華燭簫韶入翠雲頌歌侵曉聽雅吹度風聞澹泊
調元氣中和美聖君唯餘東魯客蹈舞奏南薰

滕珣

釋奠日國學觀禮聞雅頌

太學時觀禮東方曉色分威儀何棣棣環珮又紛紛古
樂從空盡清歌幾處聞六和成遠吹九奏動行雲聖上
尊儒樂春秋奠茂勳幸因陪齒列聊以頌斯文

張濯

迎春東郊

頌頊時初謝勾芒令復陳飛灰將應節賓日已知春考
厯明三統迎祥授萬人衣冠宵執玉壇墀曉清塵肅穆

來東道回環拱北辰
仗前花待發旂處柳凝新
雲歛黃山際水開素滙
濱聖朝多慶賞希為薦沈淪

唐詩品彙卷七十八

欽定四庫全書

唐詩品彙卷七十九

明 高棟 編

五言排律九

接武

下

德宗皇帝

麟德殿宴百寮

憂勤承聖緒
開泰喜時康
恭已臨羣后
垂衣御八荒
務

閒春向暮朝罷日猶長紫殿初筵列彤庭廣樂張成功
歸輔弼致理賴忠良共此懽娛事千秋樂未央

顧況

樂府

暖谷春光至宸遊近甸榮雲隨天仗轉風入御簾輕翠
蓋浮佳氣朱樓倚太清朝臣冠劍退宮女管絃迎細草
承雕輦繁花入幔城文房開聖藻武衛宿天營玉醴隨
觴至銅壺逐漏行五星含土德萬姓徹中聲親祀先崇

典躬推示勸耕國風新正樂農器近消兵道德關河回
刑章日月明野人同鳥獸率舞感昇平

寄江南鶴林寺石冰上人

山川重複出心地閣相逢忽憶秋江月如聞古寺鐘湖
平南北岸雲抱兩三峯定力超香象真言攝毒龍風中
何處鶴石上幾年松為報烟霞道人間共不容

暢當

春日過玉林園

帝里陽和日遊人到御園暖催新景氣春認蕙蘭孫詠
德先臣沒成蹊大樹存見桐猶近井看柳尚依門獻地
非更它遺忠永奉恩又期攀桂後來賞百花繁

徐嶷

送日本使還

絕國將無外扶桑更有東來朝逢聖日歸去及秋風夜
汎潮迴際晨征莽蒼中鯨波騰水府蜃氣狀仙宮天眷
何期遠王文久已同相望杳不見離恨托飛鴻

叔孫玄觀

洛出書

清洛含溫潘玄龜薦寶書波開綠字出瑞應紫宸居物
著羣靈首文成列卦初美珍翔閣鳳慶邁躍舟魚昇如
惟何遠休皇復在諸東都主人意歌頌望乘輿

戴叔倫

曉聞長樂鐘聲

漢苑鐘聲早秦郊曙色分霜凌萬戶微風散一城聞已

啓蓬萊殿初朝鴛鴦羣虛心方應物大扣欲干雲近雜
雞人唱新傳鳧氏文能令翰苑客流聽思氛氳

冷朝陽

嚴滄浪云朝陽在大
曆才子中為最下

立春

玉律傳佳節春陽應此辰土牛呈歲稔采燕表年春臘
盡星迴次寒餘月建寅風光行處好雲物望中新流水
初消凍潛魚欲振鱗梅花將柳色偏照越鄉人

戎昱

觀衛尚書九日對中使射破的

盛燕傾黃菊殊私降紫泥
月營開射圃霜旆拂晴霓
出將三朝貴彎弓五善齊
腕迴金鏃滿的破綠弦低
勇氣干牛斗歡聲振鼓聲
忠臣思報國更欲取關西

涇州觀元戎出師

寒日征西將蕭蕭萬馬叢
吹笳覆樓雪祝壽滿旗風
遮虜黃雲斷燒羌白草空
金鏡滿天外玉帳盡霜中
朔野

長城閉河源舊路通
衛青師自老魏絳賞何功
槍壘依沙迥轅門
屢塞雄燕然如可勒
萬里願從公

李益

再赴渭北使府留別

結髮逐鳴鵩連兵追谷蠡
山川搜伏虜鎧甲被重犀
故府旌旗在新軍羽校齊
報恩身未死識路馬還嘶
列嶂高峰舉當營太白低
平戎七尺劍封檢一丸泥
截海收蒲類
咆泉飲礪鵠
漢庭中選重更事五原西

羊士諤

題郡南山光福寺

傳聞黃閣守茲地賦長沙少壯稱時傑功名惜歲華巖
廊初見剝甍從亟鳴笳玉帳空巖道甘棠見野花碑殘
猶墮淚城古自啼鴉寂寂清風在懷人諒不遐

題東山石壁 并序

乾元初嚴黃門自京兆少尹貶秩牧巴郡以長才
英氣固多暇日每遊郡之東山山側精舍有盤石

細泉疏為流杯之勝苔深樹老蒼然遺躅士諤謬
因出守得繼茲賞乃詩而刻石壁

石座雙峰古雲泉九曲深寂寥疏繫意蕪沒歲時侵遠
席流還壅浮杯咽復吟追懷王謝侶更似會稽岑誰為
天池翼相期澤畔吟光輝輕尺璧然諾重黃金幾醉東
山妓長懸北闕心蕙蘭留雜珮桃李想華簪閑閣余何
事鳴騶亦屢尋軒裳遵往轍風景憩中林橫吹多淒調
高歌送好音初筵方側耳故老忽沾襟感列當弘濟平

生諒所欽無能愧陳力惆悵拂瑤琴

楊巨源

春日奉酬聖壽無疆詞十首

代是文明畫春當燕喜時壚烟添柳重宮漏出花遲漢
典方寬律周官正采詩碧霄傳鳳吹紅旭在龍旂造化
膺神器陽和沃聖慈無因隨百獸率舞在丹墀

文物京華盛謳歌國步康瑤池供壽酒銀漢麗宸章雨
露含雙闕雷霆肅萬方代推仙祚遠春共聖恩長鳳宸

臨花暖龍爐傍日香遙知千萬歲天意奉君王

日上蒼龍闕香含紫禁林晴光五雲疊春色九重深賞
協元和德文垂雅頌音景雲隨御輦顯氣在宸襟永保
無疆壽長懷不戰心聖明多慶澤瓊樹粉牆陰

雲陞臨黃道天門在碧虛大明含睿藻元氣抱宸居
戈偃征苗後詩傳燕鎬初年華富仙苑時哲滿公車化入
氤氳大恩垂泮渙餘悠然萬方靜風俗揖華胥

玉漏飄青瑣金鋪麗紫宸雲山九門曙天地一家春瑞

霽方呈賞暄風本配仁巖廊開鳳翼水殿壓鰲身文雅
逢明代驩娛及賤臣年年未央闕恩共物華新

鴛鴦彤庭際軒車綺陌前九城多好色萬井半祥烟人
醉逢堯酒鶯歌答舜絃花明御溝水香暖錦城天錫宴
文逾盛徵歡物更妍無窮艷陽月長照太平年

垂拱乾坤正歡心品類同紫烟含北極玄澤付東風珠
綴留晴景金莖直曉空發生資盛德交泰讓全功間氣
登三事祥光啓四聰遐荒似川水天外亦朝宗

睿德符玄化芳情翊太和日輪皇鑒遠天仗聖朝多曙
色含金牒晴光轉玉珂中宮陳廣樂元老進廢歌蓮葉
看龜上桐花識鳳過小臣空擊壤滄海是恩波

物象朝高殿簪裾溢上京春當九衢好天向萬方明樂
報簫韶發杯看沆瀣生芙蓉丹闕暖楊柳玉樓晴閭闔
開中禁衣裳儼太清南山同聖壽長對鳳凰城

化洽生成遂功宣動植知瑞凝三秀草春入萬年枝鳳
掖嘉言進駕行喜氣隨仗臨丹地近衣對碧山垂渥澤

方柔遠聰明本聽界願同東觀士長觀漢威儀

張仲素

上元日聽太清宮步虛

仙客開金籙元宸會玉京靈歌賓紫府雅韻出層城磬
雜音徐徹風飄響更清紆餘空外盡斷續聽中生舞鶴
紛將集流雲駐未行誰知九陌上塵俗仰遺聲

緱山鶴

羽客驂仙鶴將飛駐碧山映松殘雪在度嶺片雲還清

喉因風遠高姿對水閒笙歌憶天上城郭歎人間幾變
霜毛潔方殊藻質斑蓬瀛如可到逸翮詎能攀

陸贄

禁中春松

陰陰青禁裏蒼翠滿春松雨露恩偏近陽和色更濃高
枝分曉日靈韻雜宵鐘香助爐烟遠形疑蓋影重願符
千歲壽不羨五株封長得迴天眷全勝老碧峰

曉過南宮聞太常清樂

南宮聞古樂拂曙聽初驚烟靄遙迷處絲桐暗辨名節
隨新律改聲帶緒風輕合雅將移俗同和自感情遠音
兼曉漏餘響過春城九奏明初日寥寥天地清

張濛

曉過南宮聞太常清樂

玉珂經禮寺金奏過南宮雅調乘清曉飛聲向遠空慢
隨飄去雪輕逐度來風迥出重城裏傍聞九陌中應將
肆夏比更與五英同一聽南薰曲因知大舜功

張季畧

小苑春望宮池柳色

韶光歸漢苑柳色發秦城半見離宮出纔分遠水明青
蔥當淑景隱映媚新晴積翠烟初合微黃葉未生迎春
看尚嫩照日見先榮儻得辭幽谷高枝寄一鳴

張昔

小苑春望宮池柳色

小苑春初至皇衢日更清遙分萬條柳迴出九重城隱

映龍池潤參差鳳闕明影宜宮雪曙色帶禁烟晴深淺
殘陽變高低曉吹輕年光正堪折欲寄一枝榮

裴達

小苑春望宮池柳色

勝遊經小苑閒望上春城御路韶光發宮池柳色輕乍
濃含雨潤微澹帶雲晴暮歷殘烟斂搖揚落照明幾條
垂廣殿數樹影高旌獨有風塵客思同雨露榮

丁位

小苑春望宮池柳色

小苑宜春望宮池柳色輕低昂含曉景紫轉帶新晴似
葢芳初合如絲蔭漸成依依連水暗嫋嫋出牆明雖以
陽和發能令旅思生他時花滿路從此接遷鶯

周存

白雲向空盡

白雲生遠岫搖曳入晴空乘化隨舒卷無心任始終欲
銷仍向日將斷或因風勢薄飛難定天高色易窮影收

元氣表光滅太虛中儻若從龍出還施潤物功

禁中春松

幾歲含貞節青青紫禁中日華留偃蓋雉尾轉春風不
為繁霜改那將衆木同千枝攢翠色百尺澹晴空影密
金莖近花明鳳沼通安知幽澗側獨與散樗叢

常沂

禁中春松

映殿松偏好森森列禁中攢柯霑聖澤疎蓋引皇風晚

色連秦苑春香落漢宮操將貞石固材與直臣同翠影
宜青鎖蒼枝秀碧空還知沐天眷千載更蔥龍

令狐楚

南宮夜直宿見李給事封題其日所下制勅知
奏直在東省因以詩寄

番直同遙夜嚴局限幾重青編書白雀

其日勅鄜州奏
白雀宜付史館

黃紙降蒼龍北極絲綸句東垣翰墨蹤尚垂玄露點猶
濕紫泥封炫眼凝仙燭馳心裏禁鐘定應形夢寐暫似

接音容玉樹春枝動金樽臘醲醲在朝君最舊休澣許
過從

省中直夜對雪寄李師素侍御

密雪紛初降重城杳未開雜花飛爛熳連蝶舞徘徊灑
散千株葉銷凝九陌埃素華凝粉署清氣繞霜臺明覺
侵牕積寒知度歲來謝家爭擬絮越嶺誤驚梅暗魄微
茫照嚴飈次第催稍封黃竹亞先集紫蘭摧孫室臨書
幌梁園汎酒杯靜懷瓊樹倚醉憶玉山頽翠陌饑鳥噪

蒼雲遠雁哀此時方夜直相望意悠哉

盧景亮

寒夜聞霜鐘

洪鐘發長夜清響出層岑暗入繁霜切遙傳古木深何
城亂遠漏幾度雜疎砧已警離人夢仍知旅客襟待時
當命侶抱器本無心倘若無知者誰能設此音

鄭細

寒夜聞霜鐘

霜鐘初應律寂寂出重林拂水宜清聽凌空散迴音春
容時未歇搖曳夜方深月下和虛籟風前間遠砧靜兼
寒漏徹閒畏曙更侵遙想千山外泠泠何處尋

呂牧

涇渭揚清濁

涇渭橫秦野逶迤近帝城二渠通作潤萬戶映皆清明
晦看殊色潺湲聽一聲岸虛深草掩波動曉烟輕御獵
思投釣漁歌好濯纓合流知禹力同共到滄瀛

竇常

求自試

仙禁祥雲合高梧彩鳳遊沈冥求自試通鑿果蒙收文
墨悲無位詩書誤白頭陳王抗表日毛遂請行秋雙劍
曾埋獄司空問斗牛希垂拂拭惠感激願相投

花發上林

上苑曉沈沈花枝亂綴陰色浮雙闕近春入九門深向
煖風初扇餘寒雪尚侵艷迴秦女目愁劇越人心繞繞

時紫蝶闐闐乍引禽寧知幽谷羽一舉欲依林

王表

花發上林

上苑春何早繁花已滿林
笑迎明主仗香拂美人簪
地接樓臺近天垂雨露深
晴光來戲蝶夕影動棲禽
欲托凌雲勢先開捧日心
當知桃李樹從此必成陰

權德輿

送工部張曹長大夫奉使西蕃

金匱要略卷之七十九
殊鄰覆露同奉使小司空西候車徒出南臺節印雄弔
祠將渥命導譯暢皇風故地山河在新恩玉帛通塞雲
凝廢壘關月照鷺蓬青史書歸日馘輕五利功

晚秋陪崔閣老張秘監閣老苗考功同遊昊天
觀時楊閣老新直未滿以詩見寄斐然酬和有

愧蕪音

方駕遊何許仙源去似歸縈迴留勝賞瀟灑出塵機汎
菊賢人至燒丹姹女飛步虛清曉籟隱几吸晨輝竹徑

琅玕合芝田
沆瀣希銀鈎
三洞字瑤笥
六銖衣麗句
翻紅藥
佳期限紫微
徒然一相望
郢曲和應稀

武元衡

奉酬中書相公至日圓丘攝事合於中書後閣
宿齋移止於集賢院叙懷見寄之作

郊廟祇嚴祀
齋莊覲上玄
別開金虎觀
不離紫微天
樹古長楊接
池深太掖連
仲山方補袞
文舉自傷年
風溢銅壺漏
香凝綺閣烟
仍聞白雪唱
流詠滿鸚絃

途次近蜀驛蒙恩賜寶刀及飛龍廐馬使還因
寄李鄭二中書

草草事行役遲遲入

詩選作出

故關碧幢遙隱霧紅旆漸依

山感激慙

集作副

思淚風霜去國顏捧刀金錫字歸馬玉

連環威鳳翔雙闕征夫護百蠻

詩選作龍鳳辭三署干戈護八蠻

應憐

宣室召溫樹不同攀

夏日陪諸寮遊昊天觀因覽舊題詩寄呈楊華

州中丞

三伏草木變九城車馬煩碧霄迴騎吹丹洞入桃源臺
殿雲浮棟綏纓鶴在軒莫將真破妄聊用靜持喧石甃
古苔冷冰筠涼簟翻黃公壚下歎旌旆國東門

和楊二舍人晚秋與崔二舍人張秘監苗考功

同遊昊天觀時中書寓直不得陪隨因追往年

曾與舊僚聯遊此觀紀題在壁已有淪亡書事

感懷輒以呈寄兼呈東省三給事之作楊公見

徵鄙詞因以繼和

瑤圃高秋會金街奉詔辰朱綸天上客白石洞中人珮
響泉聲雜朝衣羽服親九重青瑣秘三秀紫芝新化藥
秦方士偷桃漢侍臣玉笙王子駕遼鶴令威身歎逝顏
波遠緘詞麗曲春重將悵恨意苔壁問遺塵

唐詩品彙卷七十九

欽定四庫全書

唐詩品彙卷八十

明 高棟 編

五言排律十

餘響

柳宗元

訓婁秀才寓居開元寺早秋月夜病中見寄

客有故園思瀟湘生夜愁病依居士室夢繞羽人丘味

道憐知止遺名得自求壁空殘月曙門掩候蟲秋

張文潛云

此聯為集中第一

謬委雙金重難將雜佩訓碧霄無枉路徒此

助離憂

韋使君黃溪祈雨見召從行至祠下口號

驕陽愆歲事良牧念苗畝列騎低殘月鳴笳度碧虛稍
窮樵客路遙駐野人居谷口寒流淨叢祠古木踈焚香
秋霧濕奠玉曉光初舂蠶巫言報精誠禮物餘惠風仍
偃草靈雨會隨車俟罪非真吏翻慙奉簡書

韓愈

送李尚書赴襄陽

帝憂南國切，改命付忠良。
壤畫星搖動，旗分獸簸揚。
五營兵轉肅，千里地還方。
控帶荆門遠，飄浮漢水長。
賜書寬屬郡，戰馬隔鄰疆。
縱獵雷霆迅，觀棋玉石忙。
風流峴首客，花艷大堤娼。
富貴由身致，誰教不自強。

和席八夔

元和十一年夔與公同掌制路故有倚市吹竽之句

絳闕銀河曙，東風右掖春。
官隨名共羨，花與思俱新。
綺

陌朝遊間綾衾夜直頻橫門開日月高閣切星辰庭變
寒前草天銷霽後塵溝聲通苑急柳色壓城勻綸綉謀
猷盛丹青步武親芳菲含黼藻光景暢形神傍砌看紅
藥巡池詠白蘋多情懷酒伴餘事作詩人倚市難臧拙
吹竽久混真坐慙空自老江海未寧身

劉禹錫

元和癸巳歲仲秋詔發江陵偏師問罪蠻徵後
命宣慰釋兵歸降凱旋之辰率爾成詠寄荆南

嚴司空

蠻水阻朝宗兵符下渚宮前籌得上策無戰已成功漢
使星飛入夷心草偃同觀謠開竹棧拜舞擲桑弓就日
知兵釋投入念鳥窮網羅三面解章奏九門通卉服聯
操袂雕題盡鞠躬降幡秋練白驛騎書塵紅火號休傳
警機橋罷亘空登山不見虜振旆自生風江遠烟波靜
軍迴氣色雄佇看聞喜後金石賜元戎

李吉甫

癸巳歲吉甫園丘攝事合於中書後閣宿齋常
負忝媿移止於集賢院會門下相公以七言垂
寄亦有所酬短章絕韻不足抒意因叙所懷奉
寄相公兼呈集賢諸學士

淮海同三入樞衡過六年廟齋兢永夕書府會羣仙粉
壁連霜曙冰池對月圓歲時憂裏換鐘漏靜中傳蓬髮
顏空老松心契獨全贈言因傳說垂訓在三篇

裴度

奉酬中書相公至日圓丘攝事合於中書後閣
宿齋移止於集賢院叙懷見寄之作

翼亮登三命謨猷本一心致齋移祕府祇事見冲襟皓
月當延閣祥風自禁林相庭方積玉王度已如金運偶
唐虞盛情同丙魏深幽蘭與白雪何處寄庸音

李觀

御溝新柳

御溝迴廣陌芳柳對行人翠色枝枝滿年光樹樹新畏

逢攀折客愁見別離辰近映章臺騎遙分禁苑春嫩陰
初覆水高影漸離塵莫入胡兒笛還令淚濕巾

馮宿

御溝新柳

夾道天渠遠垂絲御柳新千條宜向日萬戶共迎春輕
翠含煙發微音逐吹頻靜看思渡口迴望憶江濱裊裊
分遊騎依依駐旅人陽和可及攀折在茲辰

王良士

南至日隔仗望含元殿爐煙

抗殿䟽龍首高高接上玄節當南至日星是北辰天寶
戟羅仙仗金鑪引御煙霏微雙闕麗容曳九門連拂曙
祥光滿分晴瑞色鮮一陽今在厯生植仰陶甄

韋紆

風動萬年枝

嘉名標萬祀擢秀出深宮嫩葉含煙靄芳柯振惠風參
差搖翠色綺靡舞晴空氣稟禎祥異榮霑雨露同天年

方未極聖壽比應崇幸列華林裏知殊衆木中

宋迪

龍池春草

鳳闕韶光遍龍池草色勻煙波全讓綠堤柳不爭新翻
葉迎紅日飄香借白蘋幽姿偏占暮芳意欲留春已勝
生金埒長思藉玉輪翠華如見幸正好及茲辰

呂溫

和李使君三郎早秋城北亭宴崔司士因寄闕

中張評事

黃花古城路上盡見青山桑柘晴川口牛羊落照間野
情隨卷慢軍事隔重關道合偏多賞官微獨不閒鶴分
琴久罷書到鴈應還為謝登龍客瓊枝寄一攀

終南精舍月中聞磬

月峰禪室掩幽磬淨昏氛思入空門妙聲從覺路聞冷
泠流衆壑杳杳出重雲天籟疑難辨霜鐘詎可分偶來
遊法界便欲謝人羣竟夕聽真響塵心自解紛

鮑溶

薦冰

西陸宜先啟春寒寢廟清歷官分氣候天子薦精誠已
辨瑤池色如玉佩鳴禮餘神轉肅曙後月殘明雅合
冰容潔非同雪體輕空憐一掬水珍重此時情

趙蕃

薦冰

仲月開凌室齋心感聖情寒姿分玉座皓彩發丹楹積

素因風壯虛空向日明
遙涵牕戶冷近映晷旒清在掌
光逾徹當軒質自輕
良辰方可致由此表精誠

夏方慶

謝真人仙駕過舊山

何年成道去綽約化童顏
天上辭真侶人間憶舊山
桑田今已變羅徑尚堪攀
雲覆瑤壇淨苔生丹竈閒
逍遙看白石寂寞閉玄關
應是悲塵累思將羽駕還

范傳正

謝真人仙駕過舊山

麾蓋從仙府笙歌入舊山水流丹竈缺風起草堂闕白
鹿行為衛青鸞舞自閒種松鱗未老移石蘚仍斑望路
煙霄外迴輿嶺岫間豈惟遼海鶴空歎令威還

李君房

石季倫金谷故園

梓澤風沉地淒涼跡尚存殘芳迷妓女衰草憶王孫舞
態隨人謝歌聲寄鳥言池平森灌木月落弔空園流水

悲難駐浮雲影自翻賓階餘蘚石車馬詎喧喧

許堯佐

石季倫金谷故園

石氏遺文在淒涼見故園輕風思奏樂衰草憶行軒舞
榭荒苔掩歌臺墜葉繁斷雲歸舊壑流水咽清源曲者
殘虹歛叢篁宿鳥喧空餘林上月長似對金罇

陳通方

春風扇微和

習習和風扇悠悠淑氣微陽升知候改律應喜春歸池
柳晴初折林鶯暖欲飛川源浮彩翠臺館動光輝汎豔
搖丹闕揚芳入粉闈發生常有分枯朽幸因依

張籍

送鄭尚書出鎮南海

遠鎮承新命王程不暇催班行爭路送恩賜併時來牙
旆從城展兵符到府開蠻流喧夜市海色潤南臺畫角
天邊月寒門嶺上梅去知公望重多是隔春迴

和盧常侍寄華山隱者鄭氏

猶坐三峰下年深學煉丹一間松葉屋數片石花冠
酒待山中飲琴將曲裏彈開門移遠竹剪草出幽蘭
荒壁通泉架晴崖曬藥壇寄知騎省客長向白雲看

新成甲仗樓

謝氏起高樓西臨城上頭圓功百尺麗藏器五兵脩
結構榱甍固虛明戶檻幽魚龍卷旗幟霜雪積戈矛暑雨
歊蒸隔涼風宴位留地高形遠出山靜氣清優睥睨斜

光徹闌干宿霧浮
半半杭稻色脉脉苑溪流
郡化王丞相詩成沈隱侯
居茲良得景殊勝峴山遊

沈亞之

勤政樓下觀百官獻壽

御氣黃花節臨軒紫陌頭
早陽生彩仗霽色入仙樓
獻壽皆鴛鴦瞻天在冕旒
菊尊開九日鳳曆啓千秋
樂闋祥煙起杯酣瑞影收
年年歌舞夕此地慶皇休

春色滿皇州

何處春歸好偏宜在雍州
花明夾城道柳暗曲江頭
風軟遊絲重光融瑞氣浮
鬪雞憐短草乳燕傍高樓
繡轂盈香陌新泉溢御溝
行看日欲暮迴騎似川流

張嗣初

春色滿皇州

何處年華好皇州淑氣勻
韶陽潛應律草木暗迎春
柳變金堤畔蘭抽曲水濱
輕黃垂輦道微綠映天津
麗景浮丹闕晴光擁紫宸
不知幽遠地今日幾枝新

滕邁

春色滿皇州

藹藹復悠悠春歸十二樓
最明雲裏闕先滿日邊州
色媚青門外光搖紫陌頭
上林榮舊樹太掖汎新流
暖帶祥煙起晴添瑞景浮
陽和如啓蟄從此事芳遊

王涯

望禁門松雪

宿雲開霽景佳氣此時濃
瑞雪凝清禁祥煙暮小松
依

稀鴛瓦出隱映鳳樓重金闕晴光照瓊枝瑞色封茱鋪
全類玉柯偃乍疑龍詎比寒山上風霜老昔容

吳武陵

小松

貢院樓
北新栽

拂檻愛貞容移根自遠峰已曾經草沒終不任苔封葉
少初陵雪鱗生欲化龍乘春濯雨露得地近垣墉逐吹
香微動含煙色漸濃時廻日月照為謝小山松

李紳

山出雲

杳靄祥雲起飄颻翠嶺新瑩峰開石秀吐葉間松春林
靜翻空少山明度嶺頻迴崖時掩鶴幽澗或隨人姑射
朝凝雪陽臺晚伴神悠悠九霄上應坐玉京賓

白行簡

春從何處來

欲識春生處先從木德來
人門潛報柳度嶺暗驚梅
透雪寒光散消冰水鏡開
曉迎郊騎發夜逐斗杓迴
淑氣

空中變新聲雨後催偏宜
資律呂應是候陽臺

夫子鼓琴得其人

宣父窮玄奧師襄授素琴
稍殊流水引全辨聖人心慕
德聲逾感懷人意自深
泠泠傳妙手撼撼振空林
促調清風至操絃白日沈
曲終情不盡千古仰知音

李太尉重陽日得蘇屬國書

降虜意何如窮荒九月初
三秋異鄉節一紙故人書
對酒情無極開緘思有餘
感時空寂寞懷舊幾躊躇
鴈盡

平沙迥煙銷大漠虛登臺南望處掩淚對雙魚

焦郁

春雲

漫漫天涯色乘春四望平不分殘照影何處斷魂聲
繞先經塞霏微近過城因風低未歛帶雨重還輕
干呂知時泰如膏候歲成小儒同品物無以答皇明

殷堯藩

中元日觀諸道士步虛

玄都開秘錄白石禮先生上界秋光淨中元夜景清星
辰朝帝處鷺鶴步虛聲玉樹花雖老珠宮月最明掃壇
天地肅投簡鬼神驚儻賜刀圭藥還留不死名

朱餘慶

晦日同至昆明池汎舟

故人同汎處遠色望中明靜見砂痕露微思月魄生周
迴餘雪在浩渺暮雲平戲鳥隨蘭棹空波盪石鯨劫灰
難問理島樹偶知名自省曾追賞無如此日情

賈島

別徐明府

抱琴非本意生事偶相縈口尚袁安節身無子賤名地
寒春雪盛山淺夕風輕百戰餘荒野千夫漸偶耕一杯
宜獨夜孤客戀交情明日疲驂去蕭條過古城

寄賀蘭朋吉

徃徃東林下花香似火焚故園從小別夜雨近秋聞野
菜連寒木枯株簇古墳孤舟同遠客尋事入幽雲斜日

閒門掩荒田細徑分相思蟬幾處偶坐蝶成羣

劉頊溪云是謁

沈

會宿曾論道登高省議文苦吟遙可想邊葉向紛紛

落第東歸逢僧伯陽

相逢須語笑人世別離頻曉去長侵月思鄉動隔春見
僧心暫靜從俗事多迷宇宙詩名小山河客路新翠桐
猶入鑿清鏡未辭塵逸足思奔驥隨羣且退鱗宴非紅
杏寺愁在綠楊津老病難為樂開眉賴故人

李程

春臺晴望

曲臺送春日景物麗新晴
靄靄煙收翠忻忻木向榮
靜看遲日上閒愛野雲平
風慢遊絲轉天開遠水明
登高塵慮息觀微道心清
更有遷喬意颺颺出谷鶯

鄭黃

春臺晴望

追賞層臺迥登臨四望頻
熙熙山雨霽濯濯柳條新
草長秦城夕花明漢苑春
晴林翻去鳥紫陌度遊人
旅客

風塵厭山家夢寐親
遷鶯思出谷
騫翥待芳辰

高弁

春臺晴望

層臺聊一望
遍賞帝城春
風煖聞啼鳥
冰開見躍鱗
晴山煙外翠
香蕊日邊新
已變青門柳
初銷紫陌塵
金湯千里國
車騎萬方人
此處雲霄近
憑高願致身

姚合

送楊尚書祭西岳

報功嚴祀典寵詔下明庭酒氣飄林嶺香煙入杳冥樂
清三奏備辭直百神聽衣拂雲霞濕詩通水石靈何因
逐騎騎暫得到巖扃

送家兄赴任昭儀

早得白眉名之官濠上城別離浮世事迢遞長年情廣
陌垂花影遙林起雨聲出關春草長過汴夏雲生點吏
先潛去疲人相次迎宴餘和酒拜魂夢共東行

冬夜宴韓卿宅送崔玄亮赴果州

闌燭照重茵飛杯復幾分主人寒不寢上客曉離羣
騎吏緣青壁旌旗度白雲劔銘生蘚色巴字壘氷文
華省思仙侶疲民愛使君泠泠唯自適郡邸有誰聞

厲玄

緱山月夜闌子晉吹笙

緱山明月夜岑寂隔塵氛紫府參差曲清宵次第聞
韻流多入洞聲度半和雲拂竹鸞驚侶經松鶴舞羣蟾
光聽處合仙露望中分坐惜千岳曙遺音過汝濱

鍾輅

緱山月夜聞王子晉吹笙

月滿緱山夜風傳子晉笙
初聞盈谷遠漸聽入雲清
杳異人間曲遙分鶴上情
孤鸞驚欲舞萬籟寂無聲
此夕留煙駕何時返玉京
唯愁音響絕曉色出都城

許渾

蒜山津觀發軍

羽檄徵兵急轅門選將雄
犬羊憂破竹貔虎極飛蓬
定

繫獨狂虜何煩矍鑠翁更深黃石畧重振黑山公別馬
嘶營柳驚烏散井桐低星連寶劍殘日讓琯弓浪曉戈
鋌裏山晴鼓角中甲開魚照水旗颺虎拏風去想金河
遠行聞玉塞空漢庭應有問師律在元戎

送從兄別駕歸蜀川

并序

從兄彥昭與桂陽令韋伯達貞元中俱為千牛伯
達官至王府長史長慶中非罪受譴前年會赦復
故秋詔未及而已歿從兄自蜀而南發旅櫬歸葬

途上既而西還因成十韵贈別

聞與湘南令童年侍玉墀家留秦塞曲官謫障江湄道
直奸臣屏冤深聖主知逝川東去疾霈澤北來遲清漢
龍髯絕蒼岑馬鬣移風淒聞笛處月冷罷琴時客路黃
公廟鄉闕白帝祠已稱鸚鵡賦寧誦鵲鴿詩遠道書難
達長亭酒莫持當憑蜀江水萬里寄相思

李商隱

武侯廟古栢

蜀相階前栢龍蛇捧闕宮陰成外江畔老向惠陵東大
樹思馮異甘棠憶邵公葉凋相燕雨枝折海鵬風玉壘
經綸遠金刀歷數終誰將出師表一為報昭融

戲贈張書記

別館君孤枕空庭我閉關池光不受月野氣欲沈山星
漢秋方會闕河夢幾還危絃傷遠道明鏡惜紅顏古木
含風久平蕪盡日閒心知兩愁絕不斷若連環

王荆公
云唐人

學老杜而得其藩籬唯李義山一人而已至如池光不
受月野氣欲沈山之類雖少陵無以過也義山合處有

道人若用事深
解自是其短

姚鵠

送僧歸新羅

渺渺萬餘里扁舟發落暉
滄溟何歲別白首此時歸
寒暑途中變人烟嶺外稀
驚天巨鰲起蔽日大鵬飛
雪入行沙履雲生坐石衣
漢風深習得休恨本心蓮

馬戴

送冊東陵王使

越海傳金冊華夷禮命行片帆秋色動萬里信潮生日
映孤舟出沙連絕島明翳空翻大鳥飛雪噴長鯨舊鬢
迴應改選荒夢易驚何當理風檝天外問來程

岐陽逢曲陽故人話舊

異地還相見平生分可知壯年俱欲暮往事盡堪悲道
路頻艱阻親朋久別離解兵逃白刃謁帝直明時淹疾
生涯故因官世業移鷄鳴闕月落鴈度朔風吹客淚翻
岐下鄉心落海湄積愁何計遣滿酌浣相思

李頻

陝州題河上亭

岸擁洪流急亭開清興長
當軒沙草晚入坐水風涼
獨鳥驚來客孤雲觸去檣
秋聲和遠雨暮色帶微陽
浪靜澄牕影沙明發簟光
逍遙每盡日誰識愛滄浪

送太學吳康仁及第南歸

因為太學選志業徹春闈
首領諸生出先登上第歸
一榮猶未已具慶且應稀
縱馬行青草臨岐脫白衣
家遥

楚國寄帆對漢山飛知已盈華省看君再發機

府賦觀蘭亭圖

往會人何處遺蹤事可觀林亭今日在草木古春殘筆
想吟中駐杯疑飲後乾向青穿峻嶺當白認回湍月影
牕間夜湖光枕上寒不知詩酒客誰更慕前歡

杜荀鶴

御溝柳

律到九重春溝連柳色新細籠穿禁水輕拂入朝人日

近韶光早天低聖澤勻谷鶯栖未穩宮女畫難真楚國
空搖浪隨堤暗惹塵何如帝城裏先得覆龍津

張喬

華州試月中桂

與月轉鴻濛扶踈萬古同根非生下土葉不墮秋風每
向圓時足還隨缺處空影高羣木外香滿一輪中未種
丹霄日應虛白兔宮何當因羽化細得問玄功

公乘憶

春風扇微和

麗日催遲景和風扇早春暖浮丹鳳闕韶壻黑龍津澹
蕩迎仙仗霏微送畫輪綠搖宮柳散紅待禁花新舞席
潛迴雪歌筵暗起塵幸當陽候日一願及佳辰

鄭谷

奉詔試春漲曲江池

乾符丙申春

王澤尚通津恩波此日新深疑一夜雨遠似五湖春汎
灩翹振鷺澄清躍紫鱗翠低孤嶼柳香失半汀蘋鳳輦

尋佳境龍舟命近臣桂華如入手願作從遊人

遠遊

江湖猶足事食宿戍聲喧久客秋風起孤舟夜浪翻鄉
音離楚水廟貌入湘源岸對鳧鷖小林垂橘柚繁津官
來有意漁者笑無言早晚酬僧約中條有樂園

入閤

祕殿臨軒日和鑿返正年兩班文武盛百辟羽儀全霜
漏清中禁風旗拂曙天門嚴新契勤仗入邇承宣玉几

當紅旭金爐縱碧煙對收稱法吏贊引出宮鈿言動揮
毫疾威容執簿專壽山晴黻隼顯氣暖連延禮有鴛鴦
集思無雨露偏小臣叨備位歌詠泰階前

華山

峭仞聳巍巍晴嵐染近畿孤高不可狀圖寫盡應非絕
頂神仙會半空鸞鶴飛雲臺分遠靄樹谷隱斜暉墜石
連村響狂雷發廟威氣中寒涓澗影外白樓微雲對蓮
花落泉橫露掌飛乳懸危磴滑樵徹上方稀澹泞生真

趣逍遙息世機
野花明澗路
春蘚澁松園
遠洞時聞磬
羣僧畫掩扉
他年洗塵骨
香火願相依

陸宸

禁林聞曉鶯

曙色分層漢
鶯聲繞上林
報花開瑞錦
催柳綻黃金
斷續隨風遠
間關送月沈
語當溫樹近
飛覺禁園深
繡戶驚殘夢
瑤池轉好音
願將棲息意
從此沃天心

唐詩品彙卷八十